

E lucha di Aruba contra traficacion di hende

Progreso memey di retonan profundo

TRAFICACION di hende ta un di e crimenan mas scondi pero devastador na mundo. E ta horta hende nan libertad, seguridad, y dignidad, hopi biaha forsando nan den bida di explotacion y miedo. Mientras hopi ta asocia traficacion cu centronan urbano grandi of zonanan di conflicto, hasta nacionnan insular chikito manera Aruba ta enfrenta e realidad preocupante aki.


Conoci mundialmente pa su beachnan y turismo, Aruba ta tambe un pais di destino pa victimanan di traficacion, specialmente hende muhe for di paisnan bisiña manera Venezuela y Colombia. E individualnan aki hopi biaha ta wordo treci bou di promesanan falso di trabou of seguridad, solamente pa caba atrapa den trabou forsa, servicio domestico, of explotacion sexual.

Pero contrario na hopi region unda e problema ta wordo negligisha, Aruba ta trahando activamente pa combati traficacion y sostene esnan afecta. Durante e ultimo decada, el a mostra un boluntad politico cla y un compromiso institucional pa atende e problema directamente.

Entre 2015 y 2023, 34 presunto victima di traficacion di hende a wordo identifica pa autoridadnan na Aruba, cu 17 confirma oficialmente via investigacion policial. Aunke e cifranan aki por parce abou, expertonan ta subraya cu probablemente nan ta refleha un falta di denuncia y e naturalesa scondi di e crimen, no un falta di incidente. Hopi victima tin miedo di presenta nan mes, specialmente si nan ta indocumenta of tin miedo di represaya.

Como reaccion, Aruba a tuma varios paso importante. El a criminalisa tur forma di traficacion cu castigo cu ta varia di 8 pa 18 aña den prizon. Un Task Force specialisa contra Traficacion y Contrabanda di Hende a wordo crea pa coordina esfuersonan di ley y servicionan social. Campañanan di conscientisacion publico a enfoca tanto riba local como riba turista y training a wordo duna na polis, inmigracion, y inspectornan di labor.

Un evaluacion na 2024 di GRETA, e organo anti-traficacion di Consejo di Europa, a reconoce e esfuersonan aki y a elogia Aruba pa su marco legal y strategianan di prevencion. Sinembargo, el a señala tambe faltanan critico, specialmente den identificacion y sosten na victima. Por ehempel, actualmente Aruba no tin un sistema di compensacion financia pa estado pa victimanan. Shelter y servicionan hopi biaha ta mara na si e victimanan ta bay di acuerdo pa coopera



cu investigacion policial—un practica cu por descurasha denuncia. GRETA a urgi Aruba tambe pa garantisa proteccion legal pa victimanan cu por a comete delitonan menor bou di coaccion, un principio reconoci internacionalmente como e “*clausula di no-castigo*.”

Pa atende e preocupacionnan aki, Aruba ta trahando riba medidanan nobo, incluyendo miho protocolnan pa identifica victima, reforma legal, y partnershipnan cu organisacion no-gubernamental. Autoridadnan ta revisando tambe con pa duna sosten na victimanan sin importa nan cooperacion cu ley, enfocando mas riba recuperacion y reintegracion.

Geograficamente, Aruba ta vulnerabel debi na su proximidad na paisnan den crisis, particularmente Venezuela. Migrantenan cu ta huy di instabilidad hopi biaha ta un blanco facil pa traficantenan. Reconociendo esaki, e esfuersonan di Aruba no ta solamente nacional, sino regional—cooperando cu islanan bisiña y organisacionnan internacional pa comparti dato, strategia, y sosten.

Esaki no ta djis un lucha legal—e ta uno humano.